

**MALAYSIA**  
**DEWAN RAKYAT**  
**ATURAN URUSAN MESYUARAT**

**NASKHAH SAHIIH/BAHASA MALAYSIA**

<http://www.parlimen.gov>

**HARI ISNIN, 17 OKTOBER 2016, PUKUL 10.00 PAGI**

**Bil. 29**

---

**MENGANGKAT SUMPAH**

---

**PERTANYAAN-PERTANYAAN BAGI JAWAB LISAN**

1. PR-1343-L76442  
**Dato' Hasan bin Arifin [ Rompin ]** minta **PERDANA MENTERI** menyatakan apakah tindakan Malaysia terhadap kependudukan China di Kepulauan Spratly dalam isu perebutan Laut China Selatan dan adakah wujud perjanjian antara Malaysia dengan Amerika Syarikat dan Australia berkaitan perkara tersebut.
2. PR-1343-L75906  
**Dr. Tan Seng Giaw [ Kepong ]** minta **MENTERI KEWANGAN** menyatakan keadaan ekonomi negara dan langkah untuk memperbaikinya.
3. PR-1343-L75813  
**Dato' Shamsul Anuar bin Haji Nasarah [ Lenggong ]** minta **MENTERI KESIHATAN** menyatakan sejauh mana pelan tindakan Kementerian dalam mengekang penularan Virus Zika terutamanya membasmi kawasan pembiakan nyamuk Aedes di kawasan yang mencatat bacaan tertinggi bagi pembiakan nyamuk tersebut.
4. PR-1343-L76801  
**Dato' Seri Dr. Wan Azizah binti Wan Ismail [ Permatang Pauh ]** minta **MENTERI PENDIDIKAN TINGGI** menyatakan apakah Kerajaan bercadang untuk menyemak semula yuran akademik di IPTA bagi mengurangkan bebanan kos pelajar mendapatkan pendidikan tinggi dalam negara dan apakah faktor-faktor yang menghalang Kerajaan daripada merangka dasar pendidikan tinggi percuma secara menyeluruh.

5. PR-1343-L76844  
**Datuk Bung Moktar bin Radin [ Kinabatangan ]** minta **PERDANA MENTERI** menyatakan apakah perancangan utama ESSCOM dalam memerangi jenayah rentas sempadan seperti penculikan untuk tebusan memandangkan kejadian-kejadian yang masih sering berlaku dan penjenayah yang masih boleh lolos walaupun Kerajaan telah berbelanja besar untuk memastikan keselamatan di kawasan ESSZONE.
6. PR-1343-L75875  
**Dato' Takiyuddin bin Hassan [ Kota Bharu ]** minta **PERDANA MENTERI** menyatakan :-
  - (a) apakah kriteria yang dikenakan kepada Perkhidmatan UBER; dan
  - (b) sejauh manakah Perkhidmatan UBER menjejaskan pendapatan para pemandu teksi biasa.
7. PR-1343-L77154  
**Dato' Ir. Haji Nawawi bin Ahmad [ Langkawi ]** minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan berapa banyakkah projek perumahan mampu milik yang telah siap dibina dan siap diduduki dan adakah pihak Kementerian bercadang untuk menjalankan perbincangan dengan pemilik tanah dan Kerajaan negeri agar dapat mengurangkan kos pematuhan bagi membolehkan pemaju menyediakan rumah pada harga berpatutan.
8. PR-1343-L77034  
**Tuan Mohd Rafizi bin Ramli [ Pandan ]** minta **MENTERI PENDIDIKAN TINGGI** menyatakan jumlah permohonan pinjaman PTPTN yang diluluskan mengikut peringkat pembiayaan (maksimum, 75%, 50% sejak 2015 atau penuh, sebahagian, yuran sebelum itu) setiap tahun dari 2010 hingga 2016; diasingkan mengikut IPTA atau IPTS.
9. PR-1343-L77018  
**Datuk Liang Teck Meng [ Simpang Renggam ]** minta **MENTERI SAINS, TEKNOLOGI DAN INOVASI** menyatakan jenis-jenis geran dan peruntukan yang disediakan bagi pembangunan sektor teknologi inovasi dan berapakah jumlah geran yang dikeluarkan bagi tujuan tersebut bagi tahun 2013 sehingga kini.
10. PR-1343-L76625  
**Dr. Mohd Hatta bin Md. Ramli [ Kuala Krai ]** minta **PERDANA MENTERI** menyatakan :-
  - (a) berapa peratuskah kejayaan daripada Program Kebolehpasaran Graduan Skim Latihan 1Malaysia (SL1M) yang dapat mengurangkan kadar pengangguran di Malaysia; dan
  - (b) berdasarkan kepada kadar pengangguran tahun 2015 sebanyak 3.15% dan suku tahun kedua 2016 mencatat 3.4%. Apakah usaha-usaha Kerajaan bagi menurunkan kadar peratusan pengangguran ini.

11. PR-1343-L75725  
**Dato' Sri Wee Jeck Seng [ Tanjong Piai ]** minta **MENTERI KOMUNIKASI DAN MULTIMEDIA** menyatakan apakah tindakan yang diambil oleh Kementerian untuk menangani kelemahan pembekal perkhidmatan internet khususnya Syarikat Telekom Malaysia Berhad yang begitu lambat memperbaiki aduan kerosakan.
12. PR-1343-L76390  
**Tuan Zairil Khir Johari [ Bukit Bendera ]** minta **MENTERI PENDIDIKAN TINGGI** menyatakan mengapa kedudukan Universiti Sains Malaysia (USM) dalam QS 2016/2017 World University Ranking merudum dari 289 ke tempat 330 walaupun USM merupakan satu-satunya Universiti APEX.
13. PR-1343-L75634  
**Datuk Dr. Haji Abd. Latiff bin Haji Ahmad [ Mersing ]** minta **MENTERI KEWANGAN** menyatakan berapakah kos pengurusan yang dibelanjakan oleh Kerajaan bagi pemberian BRIM kepada keluarga secara online berbanding dengan secara pemberian terus secara tunai.
14. PR-1343-L76599  
**Tan Sri Dato' Seri Abd Khalid bin Ibrahim [ Bandar Tun Razak ]** minta **MENTERI PERDAGANGAN ANTARABANGSA DAN INDUSTRI** menyatakan statistik tahunan antara 2000-2015 mengenai perusahaan kecil dan sederhana (PKS) terutama bilangan syarikat mengikut sektor/industri, negeri, lokasi bandar-luar bandar, modal asal, pemilikan berdasarkan kewarganegaraan, pendapatan tahunan, bilangan pekerja berdasarkan kewarganegaraan.
15. PR-1343-L75688  
**Dr. Noor Azmi bin Ghazali [ Bagan Serai ]** minta **MENTERI KEWANGAN** menyatakan sejauh manakah *National Blue Ocean Strategy* (NBOS) telah menyumbang dalam mewujudkan Kerajaan yang cemerlang. Apakah manfaat yang telah dicapai dan apakah perancangan seterusnya.
16. PR-1343-L76881  
**Dato' Seri Abdul Hadi bin Awang [ Marang ]** minta **MENTERI DALAM NEGERI** menyatakan apakah usaha yang dilakukan untuk meningkatkan nilai integriti dalam agensi penguatkuasaan di Jabatan Imigresen dan Polis Diraja Malaysia (PDRM) dan sejauh mana keberkesanan pelan tersebut.
17. PR-1343-L76353  
**Dato' Abd. Aziz bin Haji Sheikh Fadzir [ Kulim Bandar Baharu ]** minta **MENTERI SAINS, TEKNOLOGI DAN INOVASI** menyatakan apakah hasil yang diperolehi negara dan rakyat selepas Program Angkasawan Negara Malaysia yang dilancarkan pada tahun 2006 yang lalu serta perancangan Kerajaan dalam meneruskan program ini pada masa akan datang bagi memberi manfaat kepada negara dan rakyat.

18. PR-1343-L75853  
**Tan Sri Datuk Seri Panglima Annuar bin Musa [ Ketereh ]** minta **PERDANA MENTERI** menyatakan tahap pemilikan ekuiti Bumiputera mengikut sektor pada tahun 1981 hingga 2003. Apakah langkah-langkah yang diambil untuk meningkatkan pemilikan ekuiti Bumiputera di bawah agenda pemerkasaan ekonomi Bumiputera.
19. PR-1343-L75801  
**Datuk Raime bin Unggi [ Tenom ]** minta **MENTERI PENGAJIAN TINGGI** menyatakan usaha mengekang penularan pengaruh kumpulan militan DAESH di kalangan penuntut Institusi Pengajian Tinggi (IPT).
20. PR-1343-L77281  
**Tuan Shamsul Iskandar bin Mohd Akin [ Bukit Katil ]** minta **MENTERI PENGANGKUTAN** menyatakan apakah tindakan Kerajaan terhadap Rusia susulan dapatan Pasukan Penyiasat Bersama bahawa pesawat MH17 telah ditembak jatuh dengan peluru berpandu yang telah dibawa dari Rusia dan bilakah Kerajaan akan memperakui (ratify) Arms Trade Treaty yang dilihat sebagai satu instrumen perundangan untuk menghalang penyeludupan senjata haram termasuk peluru berpandu.
21. PR-1343-L75825  
**Datuk Juslie bin Ajirol [ Libaran ]** minta **MENTERI KEWANGAN** menyatakan bagaimana Kerajaan memastikan prestasi pengurusan ekonomi negara cekap dan berhemat walaupun negara hilang lebih RM30 bilion pendapatan akibat kejatuhan harga minyak.
22. PR-1343-L75598  
**Datuk Linda Tsen Thau Lin [ Batu Sapi ]** minta **MENTERI KERJA RAYA** menyatakan bila jalan raya yang baru dibina di Sibuga melalui Kompleks Sukan Sandakan di kawasan Batu Sapi akan dilengkapi dengan lampu jalan.
23. PR-1343-L76503  
**Datuk Noor Ehsanuddin bin Mohd Harun Narrashid [ Kota Tinggi ]** minta **MENTERI KEWANGAN** menyatakan sejauh manakah keberkesanan aspirasi program Gabungan Rakan Entrepreneur Aspirasi Terhebat (GREAT) kepada usahawan muda.
24. PR-1343-L76843  
**Tuan Hee Loy Sian [ Petaling Jaya Selatan ]** minta **PERDANA MENTERI** menyatakan tindakan Suruhanjaya Pilihan Raya dalam persempadanan semula di Parlimen Petaling Jaya Selatan yang ditukar ke Petaling Jaya (P105) yang mengalami penambahan jumlah pengundi yang mendadak dari 79,558 ke 129,363 sebanyak 49,805 atau 62.6 peratus.
25. PR-1343-L76156  
**Dr. Ko Chung Sen [ Kampar ]** minta **PERDANA MENTERI** menyatakan :-
  - (a) sama ada kenyataan Menteri di Jabatan Perdana Menteri, Datuk Abdul Rahman Dahlan bahawa "Malaysian Official 1" adalah merujuk kepada Perdana Menteri Malaysia itu merupakan kenyataan yang sah atau fitnah; dan

- (b) sama ada Perdana Menteri bersetuju atau tidak dengan tuduhan salah laku yang dikaitkan dengan "Malaysian Official 1".
26. PR-1343-L76002  
**Tuan Wong Chen [ Kelana Jaya ]** minta **PERDANA MENTERI** menyatakan sama ada "Malaysian Official 1"• (MO1) yang disebut dalam saman sivil Jabatan Kehakiman Amerika Syarikat berkenaan 1Malaysia Development Berhad (1MDB) merujuk kepada Perdana Menteri sendiri.
27. PR-1343-L77298  
**Dr. Ong Kian Ming [ Serdang ]** minta **MENTERI PENDIDIKAN TINGGI** menyatakan sama ada PTPTN akan melaksanakan pelan pembayaran balik pendapatan kontinjen (*income contingent repayment*) dan jumlah peminjam yang telah berjaya untuk berunding semula dengan PTPTN untuk mengurangkan bayaran bulanan pinjaman PTPTN sejak tahun 2013.
28. PR-1343-L77038  
**Tuan Mohd Rafizi bin Ramli [ Pandan ]** minta **PERDANA MENTERI** menyatakan senarai setiap penerbangan (dengan memberi perincian masa, destinasi dan penumpang) jet ACJ319 A6-CJE yang disewa oleh Kerajaan Malaysia dan perincian kos yang ditanggung sepanjang tempoh ia disewa.
29. PR-1343-L76712  
**Tuan Oscar Ling Chai Yew [ Sibü ]** minta **PERDANA MENTERI** menyatakan jumlah pengundi di Malaysia dan senaraikan mengikut kaum, dan jumlah orang yang layak tetapi belum mendaftar sebagai pengundi, senaraikan mengikut kaum.
30. PR-1343-L76145  
**Dr. Ko Chung Sen [ Kampar ]** minta **PERDANA MENTERI** menyatakan :-
- (a) sama ada beliau telah membaca sepenuhnya tuntutan mahkamah oleh Jabatan Kehakiman (DOJ) di Amerika Syarikat untuk merampas aset bernilai AS\$1 billion yang dibeli dengan wang yang diambil daripada 1MDB; dan
- (b) sama ada Perdana Menteri boleh mengesahkan mana-mana butiran di dalam saman Jabatan Kehakiman (DOJ) tersebut adalah tersesat dan tidak benar terhadap mana-mana individu atau pegawai kerajaan Malaysia.
31. PR-1343-L76763  
**Dato' Seri Dr. Wan Azizah binti Wan Ismail [ Permatang Pauh ]** minta **PERDANA MENTERI** menyatakan berikutan dengan pendedahan yang dibuat oleh *Department of Justice* (DOJ) bahawa terdapat penglibatan *Malaysian Official 1* (MO1) dalam kes sivil *Red Granite*, apakah Kerajaan Malaysia telah mengenalpasti siapakah MO1 dan tindakan yang diambil terhadap MO1 susulan daripada pendedahan tersebut dan jika tiada tindakan mengapa.

32. PR-1343-L76328  
**Dato' Mansor bin Othman [ Nibong Tebal ]** minta **PERDANA MENTERI** menyatakan jumlah bilangan lot dan keluasan tanah-tanah wakaf yang didaftarkan oleh Jabatan Agama mengikut negeri sehingga kini dan perincian perancangan pembangunan serta status pelaksanaan projek-projek pembangunan di tanah-tanah tersebut.
33. PR-1343-L76230  
**Tuan Sim Tze Tzin [ Bayan Baru ]** minta **PERDANA MENTERI** menyatakan siapakah "Malaysian Official 1" yang dinyatakan oleh Department of Justice Amerika Syarikat. Sudahkah Kerajaan menghubungi Department of Justice untuk mendapatkan maklumat lanjut siasatan kes tersebut.
34. PR-1343-L75995  
**Tuan Tan Kok Wai [ Cheras ]** minta **PERDANA MENTERI** menyatakan kriteria dan formula yang digunapakai oleh Suruhanjaya Pilihan Raya ketika membuat persempadanan semula kawasan-kawasan pilihan raya Parlimen dan negeri pada tahun ini yang didakwa berat sebelah dan menimbulkan kesangsian.
35. PR-1343-L75860  
**Datuk Zahidi bin Zainul Abidin [ Padang Besar ]** minta **MENTERI PERTAHANAN** menyatakan :-
- (a) adakah kementerian akan mempertimbangkan mewujudkan segera 'Amanah Saham Veteran' oleh LTAT atau agensi yang sesuai bagi menjaga kebajikan dari sudut 'aset dan aliran pendapatan yang konsisten bagi para Pesara Tentera (Veteran)' apabila mereka bersara; dan
  - (b) adakah sumbangan geran awal kepada Pesara Tentera baharu dan lama bagi menyertai Skim tersebut akan dipertimbangkan oleh Kerajaan.
36. PR-1343-L75564  
**Tuan Budiman bin Mohd. Zohdi [ Sungai Besar ]** minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan berapakah jumlah lesen dan permit iklan Pemberi Pinjam Wang (PPW) yang telah dikeluarkan sehingga kini dan apakah usaha yang dilakukan bagi membanteras masalah PPW haram di negara ini.
37. PR-1343-L76908  
**Dato' Noraini binti Ahmad [ Parit Sulong ]** minta **MENTERI DALAM NEGERI** menyatakan berapakah jumlah terkini mengenai penahanan suspek yang terlibat dalam aktiviti keganasan golongan militan Daesh (IS) dan sejauh manakah gerakan fahaman Daesh ini telah dihalang di dalam negara.

38. PR-1343-L76290  
**Dr. Haji Izani bin Haji Husin [ Pengkalan Chepa ]** minta **MENTERI KESIHATAN** menyatakan apakah penyelesaian kepada masalah graduan jurusan perubatan yang menunggu begitu lama untuk mendapatkan penempatan pegawai perubatan siswazah sehingga ada yang terpaksa bekerja sebagai doktor sambilan.
39. PR-1343-L76089  
**Dato' Hasbullah bin Osman [ Gerik ]** minta **MENTERI KOMUNIKASI DAN MULTIMEDIA** menyatakan apakah usaha yang telah dilakukan bagi menyelesaikan masalah talian telekomunikasi yang masih lemah di kawasan luar bandar terutamanya dalam Parlimen Gerik.
40. PR-1343-L75966  
**Tuan Mohamed Hanipa bin Maidin [ Sepang ]** minta **MENTERI PENDIDIKAN** menyatakan bilakah Kementerian akan membina sekolah menengah di Kota Warisan, Sepang di tapaknya yang ada sekarang.
41. PR-1343-L75629  
**Dato' Wira Othman bin Abdul [ Pendang ]** minta **MENTERI KESIHATAN** menyatakan mengapa berlaku kelambatan pembinaan Hospital Daerah Pendang.
42. PR-1343-L77125  
**Tuan Haji Khalid bin Abdul Samad [ Shah Alam ]** minta **PERDANA MENTERI** menyatakan sama ada cadangan persempadanan baharu oleh SPR tempoh hari mematuhi syarat-syarat keadilan seperti terkandung di dalam Perlembagaan Persekutuan.
43. PR-1343-L77378  
**Tuan Ramkarpal Singh a/l Karpal Singh [ Bukit Gelugor ]** minta **MENTERI DALAM NEGERI** menyatakan sama ada Kerajaan telahpun membuat permintaan rasmi (*submitted a formal request*) kepada Kerajaan Australia untuk mengekstradisi Kpl. Sirul Azhar Umar ke Malaysia sekiranya ya, nyatakan tarikh permintaan tersebut dibuat.
44. PR-1343-L77080  
**Puan Kasthuriraani a/p Patto [ Batu Kawan ]** minta **PERDANA MENTERI** menyatakan apakah rancangan Kerajaan untuk menggubal undang-undang baru berhubung "*sexual grooming*" memandangkan teknologi komunikasi memudahkan pemangsa berhubung dengan mangsa kanak-kanak dan remaja. Jika ya, apakah kandungan rang undang-undang baru ini dan bilakah ia akan dibentangkan di Parlimen dan jika tidak mengapa.
45. PR-1343-L76150  
**Dr. Ko Chung Sen [ Kampar ]** minta **PERDANA MENTERI** menyatakan :-
- (a) sama ada kerajaan Malaysia sedang membantu Jabatan Kehakiman (DOJ) di Amerika Syarikat untuk merampas semula aset bernilai AS\$1 billion yang dikaitkan dengan wang yang diambil dari 1MDB dan jumlah besar wang yang telah diambil melalui penipuan dan pengubahan wang haram daripada 1MDB; dan

- (b) sama ada kerajaan Malaysia telah meminta Amerika Syarikat dan negara lain termasuk United Kingdom, Switzerland dan Singapura untuk mengembalikan mana-mana aset tersita yang dibeli dengan dana yang diambil dari 1MDB.
46. PR-1343-L75518  
**Puan Teresa Kok Suh Sim [ Seputeh ]** minta **MENTERI WILAYAH PERSEKUTUAN** menyatakan rasional Kementerian menswastakan parkir di Kuala Lumpur kepada satu syarikat swasta. Sila nyatakan kriteria pemilihan syarikat tersebut, jumlah lot parkir di Kuala Lumpur dan anggaran jumlah kutipan parkir yang dijangka diperolehi melalui sistem parkir yang baru.
47. PR-1343-L76260  
**Tuan Haji Nasrudin bin Hassan [ Temerloh ]** minta **MENTERI PERTANIAN DAN INDUSTRI ASAS TANI** menyatakan tahap jaminan makanan (*food security*) di negara ini.
48. PR-1343-L75838  
**Tuan Gobind Singh Deo [ Puchong ]** minta **MENTERI KERJA RAYA** menyatakan langkah-langkah yang akan diambil bagi mengatasi masalah kesesakan jalan raya di kawasan Parlimen Puchong khususnya di Jalan Putra Permai.
49. PR-1343-L76576  
**Tuan Ahmad Marzuk bin Shaary [ Bachok ]** minta **MENTERI PERTANIAN DAN INDUSTRI ASAS TANI** menyatakan 10 pokok buah yang paling berpotensi untuk ditanam oleh rakyat Malaysia bagi menjana pendapatan. Apakah usaha, galakan dan insentif serta bantuan yang diberikan oleh kerajaan.
50. PR-1343-L76147  
**Puan Alice Lau Kiong Yieng [ Lanang ]** minta **PERDANA MENTERI** menyatakan :-
- (a) siapa "Malaysian Official 1"(MO1) yang disebut dalam laporan Jabatan Keadilan (DOJ) Amerika Syarikat pada 20/7/2016 dan adakah siasatan dijalankan ke atas MO1; dan
- (b) tindakan Kerajaan berhubung laporan DOJ.
51. PR-1343-L77358  
**Dato' Sri Haji Abdul Azeez bin Abdul Rahim [ Baling ]** minta **MENTERI KERJA RAYA** menyatakan memandangkan pembinaan jalan-jalan baru yang telah dibina, ada banyak kawasan-kawasan jalan lama di tepi-tepi jalan baru yang dibina dilihat terbiar dan apakah rancangan Kementerian terhadap jalan-jalan terbiar ini. Adakah Kerajaan bercadang supaya dibina kawasan-kawasan kedai di kawasan-kawasan terbiar di tepi-tepi jalan baru tersebut yang membolehkan penduduk di kawasan sekitar menjana pendapatan.



52. PR-1343-L76293  
**Ust. Datuk Dr. Mohd. Khairuddin bin Aman Razali [ Kuala Nerus ]** minta **MENTERI DALAM NEGERI** menyatakan kewajaran dan keperluan untuk mengambil pengawal keselamatan warga asing dan syarat-syarat yang mesti dipenuhi oleh mereka untuk diambil bekerja di negara ini.
53. PR-1343-L77041  
**Tuan Mohd Rafizi bin Ramli [ Pandan ]** minta **PERDANA MENTERI** menyatakan jumlah jemaah haji yang menunaikan haji mengikut kategori “muassasah” □ dan “pakej” □ (bagi “pakej” senaraikan 10 syarikat pengendali haji swasta terbesar mengikut jumlah jemaah) mengikut tahun dari 2010 hingga 2016.
54. PR-1343-L76657  
**Dato' Haji Mahfuz bin Omar [ Pokok Sena ]** minta **PERDANA MENTERI** menyatakan :-
- (a) adakah Akta Kesalahan Jenayah Syariah (Wilayah-Wilayah Persekutuan) 1997 akan dipinda jika usul pindaan Akta 355 Mahkamah Syariah (Bidang Kuasa Jenayah) 1965 diluluskan dan pindaannya dibuat; dan
  - (b) apakah pindaan yang akan dibuat kepada Akta Kesalahan Jenayah Syariah (Wilayah-Wilayah Persekutuan) 1997.
55. PR-1343-L77400  
**Datuk Haji Shabudin bin Yahaya [ Tasek Gelugor ]** minta **MENTERI PENDIDIKAN TINGGI** menyatakan adakah pihak Kerajaan bercadang untuk meneruskan kembali diskaun bagi bayaran balik PTPTN terhadap pembayaran penuh atau rebat kepada peminjam PTPTN.
56. PR-1343-L77442  
**Datuk Sapawi bin Ahmad Wasali [ Sipitang ]** minta **MENTERI LUAR NEGERI** menyatakan keberhasilan rundingan tiga negara iaitu Malaysia, Indonesia dan Filipina untuk menjamin keselamatan pelayaran kapal di perairan Laut Sulu yang menjadi sasaran kumpulan pengganas menculik mangsa bagi mendapatkan wang tebusan.
57. PR-1343-L76885  
**Tuan Loke Siew Fook [ Seremban ]** minta **MENTERI KEWANGAN** menyatakan secara terperinci jumlah kutipan Cukai Barangan dan Perkhidmatan (GST) yang diterima oleh Kerajaan setakat ini untuk tahun 2016 dan apakah tindakan Kerajaan sekiranya jumlah kutipan tidak mencapai anggaran yang diunjurkan dalam Belanjawan 2016.

**PADA PERMULAAN URUSAN MESYUARAT**  
**MENGEMUKAKAN RANG UNDANG-UNDANG KERAJAAN**  
**UNTUK BACAAN KALI YANG PERTAMA**

1. **Menteri Kewangan**

- \* Rang Undang-Undang Perbekalan 2017.

2. **Menteri Kewangan**

- \* Rang Undang-Undang Bank Pelaburan Infrastruktur Asia 2016.

3. **Menteri Kesejahteraan Bandar, Perumahan dan Kerajaan Tempatan**

- \* Rang Undang-Undang Perancangan Bandar dan Desa (Pindaan) 2016.

4. **Menteri di Jabatan Perdana Menteri**

- \* Rang Undang-Undang Mahkamah (Kaedah-Kaedah Pemulaan Tindakan Sivil) 2016.

5. **Menteri di Jabatan Perdana Menteri**

- \* Rang Undang-Undang Pentadbiran Undang-undang Islam (Wilayah-Wilayah Persekutuan) (Pindaan) 2016.

---

\* Menandakan bahawa Rang Undang-undang ini akan dibawa pada semua peringkat di mesyuarat ini.

**ATURAN URUSAN MESYUARAT DAN USUL-USUL****1. Menteri Belia dan Sukan akan mencadangkan:-**

Bahawa Dewan ini,

**Mengiktiraf** dan mengucapkan setinggi-tinggi tahniah kepada keseluruhan kontinjen Olimpik dan Paralimpik negara di Rio 2016 kerana mencapai prestasi terbaik Malaysia di kedua-dua temasya;

**Meraikan** detik kebersatuan yang dicipta kontinjen Olimpik dan Paralimpik Rio 2016 melalui kejayaan bersejarah yang dilakar khususnya oleh atlet-atlet yang membawa pulang pingat untuk Malaysia;

**Mempersetujui** keputusan Kerajaan untuk memberi insentif kepada atlet biasa dan atlet kurang upaya yang telah memenangi pingat serta menyeru pihak swasta, media, dan komuniti masyarakat untuk mengekalkan tahap sokongan kepada atlet-atlet Malaysia;

**Menyokong** segala usaha untuk mengekalkan momentum kejayaan sukan Malaysia ke arah Sukan SEA dan Sukan Para ASEAN di Kuala Lumpur 2017; dan

**Bahawa** dalam mengambil persetujuan di atas, Dewan ini menyeru agar semua pihak berkaitan memberikan sokongan tidak berbelah bahagi dalam menjayakan agenda nasional untuk menjadikan Malaysia sebuah negara bersukan.

- |    |              |  |                                   |
|----|--------------|--|-----------------------------------|
| 2. | (D.R.5/2016) | Rang Undang-undang Ordinan Peguam<br>Bela (Sabah) (Pindaan) 2016 | <b>Bacaan Kali<br/>Yang Kedua</b> |
|----|--------------|--|-----------------------------------|

**[ Menteri di Jabatan Perdana Menteri ]**

3. **Menteri Kewangan** akan mencadangkan:-

“Bahawa Dewan ini, mengikut peruntukan subperenggan 8(3)(a)(iv) Akta Tatacara Kewangan 1957 [Akta 61], mengambil ketetapan bersetuju supaya Kerajaan Malaysia melalui Menteri Kewangan (Diperbadankan), membuat pelaburan dengan menukarkan sebahagian pinjaman yang diberikan oleh Kerajaan Malaysia sebanyak RM500 juta kepada Small Medium Enterprise Development Bank Malaysia Berhad (SME Bank), sebuah syarikat yang dimiliki oleh Menteri Kewangan (Diperbadankan) kepada ekuiti bersamaan dengan Lima Ratus Juta (500,000,000) unit saham biasa pada RM1 bagi satu unit saham”.

4. **Dato’ Seri Abdul Hadi bin Awang [ Marang ]** akan mencadangkan:-

“Bahawa Dewan ini memberikan kebenaran menurut Peraturan Mesyuarat 49 (1) kepada Yang Berhormat Ahli bagi kawasan Marang untuk mencadangkan suatu Rang Undang-undang Ahli Persendirian bernama Rang Undang-undang Mahkamah Syariah (Bidang Kuasa Jenayah) (Pindaan) 2016 seperti berikut:-

i. menggantikan Seksyen 2 dengan seksyen berikut:

“**2.** Mahkamah Syariah akan mempunyai kuasa ke atas seseorang penganut agama Islam dan di dalam hal-hal kesalahan di bawah perkara-perkara yang disenaraikan di dalam Butiran 1 Senarai Negeri di bawah Jadual Kesembilan Undang-Undang Persekutuan.”; dan

ii. memasukkan selepas seksyen 2 dengan seksyen berikut:

“**2A.** Dalam menjalankan undang-undang jenayah di bawah Seksyen 2 Mahkamah Syariah berhak menjatuhkan hukuman yang dibenarkan oleh undang-undang syariah berkaitan hal-hal kesalahan yang disenaraikan di bawah seksyen yang disebutkan diatas, selain dari hukuman mati.”

**[ Menteri di Jabatan Perdana Menteri ]**

5. PR-1343-U75583

**Datuk Dr. Makin @ Marcus Mojigoh [ Putatan ]** akan mencadangkan:-

"Bahawa Dewan ini mengambil maklum bahawa, kesan pemanasan global telah mencapai satu tahap yang amat serius di mana disebabkan peningkatan paras air laut, terdapat banyak sawah-sawah padi tidak lagi dapat ditanam dengan tanaman padi disebabkan sawah-sawah padi ini telah dicemari dengan air masin.

Dan mengambil maklum juga bahawa kesan daripada fenomena ini, para petani terutama sekali mereka yang menanam padi di sawah-sawah padi yang berkedudukan tanah rendah atau pesisir pantai kehilangan punca pendapatan dan sekaligus kualiti hidup mereka turut terjejas. Dan mengambil maklum juga bahawa, sebagai langkah mitigasi bagi memulihkan ekonomi para petani ini, Kerajaan hendaklah membantu mereka dengan memperkenalkan tanaman bernilai komersial lain, yang sesuai ditanam di sawah yang dimasuki air masin tersebut seperti penanaman kelapa pandan dan sebagainya. Dan mengambil maklum juga bahawa penyediaan dan pengorekan perparitan untuk meninggikan paras tanah yang dimaksudkan di atas, di kawasan yang terlibat akan membolehkan kawasan yang terlibat tidak ditenggelami air masin. Maka, bagi menangani masalah ini, Dewan ini hendaklah mengambil ketetapan bahawa, di samping menangani isu pemanasan global secara serius, Kerajaan juga harus segera membantu para petani (atau pesawah padi) dalam mengusahakan semula sawah-sawah padi mereka yang terjejas oleh fenomena ini, dengan memperkenalkan tanaman bernilai komersial yang baru di tanah tersebut."

**[ Menteri Pertanian dan Industri Asas Tani ]**

6. PR-1343-U75584

**Datuk Dr. Makin @ Marcus Mojigoh [ Putatan ]** akan mencadangkan:- "Bahawa Dewan ini mengambil maklum bahawa dengan purata hujan tahunan negara kini telah meningkat sering kita dengar tentang keadaan banjir kilat yang telah banyak menyebabkan kemusnahan harta benda, ameniti sosial, kerosakan alam sekitar dan lain-lain yang menjangkau jutaan ringgit nilainya. Dan mengambil maklum juga bahawa keadaan banjir ini ditambah burukkan lagi di mana banyak kolam dan paya ditimbus bagi pembangunan hartanah dan sebagainya. Ini menyebabkan sungai-sungai dan terusan tidak lagi dapat menampung jumlah air yang mengalir secara mendadak. Dan mengambil maklum juga bahawa, sebagai langkah mitigasi, kolam-kolam air yang luas boleh diwujudkan dalam sesuatu kawasan bagi menampung air hujan lebat yang turun sebelum ianya mengalir ke sungai-sungai dan terusan, sekali gus dapat mengurangkan kejadian banjir kilat. Dan mengambil maklum juga bahawa, takungan air di kolam-kolam tadi boleh juga dirawat dan disalurkan ke empangan bekalan air yang mana boleh digunakan sebagai air terawat oleh para pengguna. Dan mengambil maklum juga bahawa air daripada takungan kolam itu juga boleh disalurkan kepada industri-industri yang memerlukannya di samping digunakan untuk menyiram tanaman atau taman-taman. Maka, bagi menangani masalah banjir kilat ini, dewan yang mulia ini hendaklah mengambil ketetapan bahawa Kerajaan hendaklah mensyaratkan bahawa sebelum sesuatu zon itu dibangunkan, satu kawasan kolam takungan air hendaklah disediakan bagi maksud di atas."

**[ Menteri Sumber Asli dan Alam Sekitar ]**

7. PR-1343-U75585

**Datuk Dr. Makin @ Marcus Mojigoh [ Putatan ]** akan mencadangkan:-

"Bahawa Dewan ini mengambil maklum bahawa, ramai graduan serta lulusan sekolah menengah tidak berpeluang untuk mendapatkan kerja dan kebanyakan mereka ini akhirnya hanya berlegar di kampung masing-masing dan tidak berpendapatan. Dan mengambil maklum juga bahawa, masih banyak peluang-peluang perniagaan yang boleh diusahakan di kampung-kampung sekiranya mereka yang berminat mendapat latihan, bimbingan dan bantuan kewangan yang secukupnya. Dan mengambil maklum juga bahawa pihak Kerajaan telah beberapa kali mengutarakan program pembangunan desa seperti program satu kampung satu industri, namun belum ada lagi program seumpamanya yang benar-benar berjaya. Dan mengambil maklum juga bahawa kebanyakan bekalan bahan mentah bagi penghasilan produk makanan, herba, tenusu dan lain-lain lagi boleh didapati di kampung-kampung dengan mudah. Dan mengambil maklum juga bahawa, melalui program "cottage industry" bukan sahaja penduduk kampung yang terlibat dalam program ini akan mendapat manfaat, malah negara secara keseluruhannya akan mendapat manfaat daripada aliran aktiviti ekonomi yang dijana. Maka, bagi menangani masalah ini, Dewan yang mulia ini hendaklah mengambil ketetapan bahawa Kerajaan merumuskan satu mekanisme yang lebih efektif bagi menggalakkan penglibatan penduduk kampung dalam aktiviti "cottage industry" yang mana akan dapat membawa manfaat kepada 15-20 orang daripada setiap kampung."

**[ Menteri Kemajuan Luar Bandar dan Wilayah ]**

8. PR-1343-U75586

**Datuk Dr. Makin @ Marcus Mojigoh [ Putatan ]** akan mencadangkan:-

"Bahawa Dewan ini mengambil maklum bahawa kos sara hidup keluarga telah meningkat dengan mendadak dan ini dapat dirasakan begitu hebat sekali oleh mereka daripada golongan berpendapatan rendah. Dan mengambil maklum juga bahawa teknologi solar yang terdapat pada hari ini dapat membekalkan tenaga elektrik dengan murah dan mesra alam. Dan mengambil maklum juga bahawa kadar penurunan hujan di negara ini agak tinggi dan boleh membekalkan bekalan air mentah yang cukup sekiranya ditadahkan dan disimpan dengan baik. Maka, bagi meringankan kos sara hidup keluarga terutama sekali mereka yang dari golongan berpendapatan rendah, Dewan yang mulia ini hendaklah mengambil ketetapan bahawa, semua pembinaan PPRT yang baru hendaklah dilengkapi dengan sistem tenaga solar dan tangki tadahan air bagi membolehkan pemilik rumah tersebut menurunkan sedikit kos sara hidup keluarga mereka."

**[ Menteri Kesejahteraan Bandar, Perumahan dan Kerajaan Tempatan ]**

9. PR-1343-U75587

**Datuk Dr. Makin @ Marcus Mojigoh [ Putatan ]** akan mencadangkan:-

"Bahawa Dewan ini mengambil maklum bahawa, terdapat desas-desus bahawa pencarum Kumpulan Wang Simpanan Pekerja (KWSP) yang masih menabung dalam KWSP, yang telah mencapai umur 75 tahun, yang dikatakan mencecah jumlah 260,000 orang, tidak lagi dibayar dividen ke atas simpanan mereka di dalam KWSP, seperti yang disiarkan oleh akhbar The Sun Daily. Dan mengambil maklum juga bahawa, kekeliruan ini adalah disebabkan oleh polisi KWSP yang dikeluarkan pada tahun 2008, melalui Akta KWSP 1991 yang menerangkan bahawa simpanan para pencarum yang telah mencapai umur 75 tidak akan dibayar dividen. Dan mengambil maklum juga bahawa para pesara yang masih menyimpan akaun dengan pihak KWSP masih memerlukan sumber pendapatan yang terurus dengan kadar pulangan yang baik dan KWSP dikatakan memberikan kadar pulangan yang baik serta terjamin selamat. Maka, bagi menangani masalah ini dan membela nasib para pendeposit KWSP yang dimaksudkan, Dewan yang mulia ini hendaklah mengambil ketetapan bahawa Kerajaan hendaklah segera meminda Akta 1991 dan membatalkan polisi KWSP 2008 bagi memastikan agar para pencarum atau penabung KWSP menerima dividen selagi mereka masih mempunyai akaun yang aktif dengan KWSP."

**[ Menteri Kewangan ]**

10. PR-1343-U75588

**Datuk Dr. Makin @ Marcus Mojigoh [ Putatan ]** akan mencadangkan:-

"Bahawa Dewan ini mengambil maklum bahawa, kos barangan dan kos sara hidup di negeri Sabah adalah antara yang tertinggi di negara ini dan polisi kabotaj, dikatakan sebagai antara penyebab utama keadaan ini berlaku. Dan mengambil maklum juga bahawa, akibat polisi kabotaj ini, kapal-kapal dagang dari luar negara tidak dibenar memunggah dan mengangkut barangan dari mana-mana pelabuhan di Malaysia kecuali di Pelabuhan Klang. Ini menyebabkan barangan tersebut terpaksa di angkut semula dengan kos tambahan ke pelabuhan-pelabuhan di negeri Sabah dan Sarawak. Dan mengambil maklum juga bahawa disebabkan polisi kabotaj ini, kadar caj penghantaran antara pelabuhan ditetapkan oleh pihak perkapalan dengan kawalan terhad oleh pihak Kerajaan. Misalnya, caj penghantaran kontena 20 kaki dari pelabuhan Klang ke pelabuhan Kota Kinabalu ialah RM2,436, ke pelabuhan Sandakan RM3,235 dan ke pelabuhan Tawau RM3,336. Ternyata caj ini adalah terlalu tinggi jika dikira dari segi jarak batu nautika antara pelabuhan berbanding dengan caj penghantaran di pelabuhan-pelabuhan lain. Maka, bagi menangani masalah ini serta mengimbangi harga barangan dan kos sara hidup di negeri Sabah, Dewan yang mulia ini hendaklah mengambil ketetapan bahawa Kerajaan hendaklah segera membatalkan polisi kabotaj ini bagi meringankan beban rakyat Sabah dan Sarawak khususnya."

**[ Menteri Kewangan ]**

11. PR-1343-U75589

**Datuk Dr. Makin @ Marcus Mojigoh [ Putatan ]** akan mencadangkan:-

"Bahawa Dewan ini mengambil maklum bahawa banjir warga asing ke negara ini telah membawa budaya yang kurang baik di negara ini di mana mereka dengan sewenang-wenangnya membuang sampah merata-rata dan ini dapat kita lihat di kota-kota besar pada hujung minggu di mana mereka ini keluar beriadah. Dan mengambil maklum juga bahawa, sejak akhir-akhir ini, penduduk tempatan juga telah mula dijangkiti dengan sikap kutu sampah yang dimaksudkan di atas, di mana penduduk tempatan juga mula membuang sampah merata-rata. Dan mengambil maklum juga bahawa penularan pelbagai jenis penyakit bawaan vektor, tikus, lipas dan lalat, pembuangan sampah merata-rata telah menambah-burukkan lagi ancaman kesihatan di negara ini. Maka, bagi menangani masalah ini, Dewan yang mulia ini hendaklah mengambil ketetapan bahawa Kerajaan Malaysia hendaklah memindah undang-undang bagi menghukum kutu-kutu sampah dengan hukuman lebih berat lagi disamping menggalakkan lebih banyak usaha untuk kitar semula dijalankan."

**[ Menteri Kesejahteraan Bandar, Perumahan dan Kerajaan Tempatan ]**

12. PR-1343-U76223

**Tuan Nga Kor Ming [ Taiping ]** akan mencadangkan:-

"Bahawa Dewan yang mulia ini meluluskan satu ketetapan supaya Laporan Ketua Audit Negara berkenaan dengan isu 1 MDB (1 Malaysia Development Bhd) dibentang dan dikemukakan untuk perbahasan di Dewan Rakyat dengan kadar segera."

**[ Perdana Menteri ]**

13. PR-1343-U76225

**Tuan Nga Kor Ming [ Taiping ]** akan mencadangkan:-

"Bahawa Dewan yang mulia ini meluluskan satu ketetapan supaya YAB Perdana Menteri dan seluruh anggota Menteri Kabinet mengisytiharkan harta dan aset mereka kepada Dewan Rakyat tiap-tiap tahun pada bulan Disember."

**[ Perdana Menteri ]**



14. PR-1343-U76226

**Tuan Nga Kor Ming [ Taiping ]** akan mencadangkan:-

"Bahawa Dewan yang mulia ini meluluskan satu ketetapan supaya mengesyorkan kepada DYMM Seri Paduka Baginda Yang Di Pertuan Agong untuk menubuhkan satu Suruhanjaya Diraja supaya menyiasat dan mengemukakan laporan siasatan terhadap skandal kewangan 1MDB dengan kadar segera."

**[ Perdana Menteri ]**

15. PR-1343-U76228

**Tuan Nga Kor Ming [ Taiping ]** akan mencadangkan:-

"Bahawa Dewan yang mulia ini meluluskan satu ketetapan selaras dengan titah Majlis Raja-Raja Melayu dimana Akta Majlis Keselamatan Negara 2016 dibentang dan dikaji semula di Dewan Rakyat dengan kadar segera."

**[ Perdana Menteri ]**

16. PR-1343-U77356

**Tuan M. Kulasegaran [ Ipoh Barat ]** akan mencadangkan:-

"Bahawa Dewan ini mengambil maklum, Parlimen sepatutnya mengambil maklum kes penembakan Lucus a/l Asirvatham dari Ipoh semasa bekerja di kebunnya di Chemor Perak pada 11 Ogos 2016 oleh seorang bekas pegawai kanan polis.

Kes penembakan tersebut perlu disiasat secara ketat dan efektif melalui penubuhan sebuah badan jawatankuasa yang bebas dan integriti serta laporannya diumumkan kepada orang ramai (made public)."

**[ Menteri Dalam Negeri ]**

17. PR-1343-U75910

**Dr. Tan Seng Giaw [ Kepong ]** akan mencadangkan:-

"Bahawa Dewan ini membahaskan langkah-langkah untuk mencegah penganas di Malaysia."

**[ Menteri Dalam Negeri ]**

18. PR-1343-U75911

**Dr. Tan Seng Giaw [ Kepong ]** akan mencadangkan:-

"Bahawa Dewan ini memperbincangkan dasar penyelenggaraan semua jenis pengangkutan di negara".

**[ Menteri Pengangkutan ]**

19. PR-1343-U75794

**Tuan Fong Kui Lun [ Bukit Bintang ]** akan mencadangkan:-

"Bahawa Kerajaan mempergiatkan usaha untuk meyatupadukan rakyat berbilang kaum di Malaysia yang kelihatan masih lemah dan longgar meskipun negara telah menjadi negara merdeka dan berdaulat sejak 59 tahun lalu supaya mereka boleh hidup dengan aman dan saling memerlukan dan memahami antara satu sama lain bagi memudahkan mereka membangunkan ekonomi negara secara bersama dan merealisasikan impian Malaysia."

**[ Perdana Menteri ]**

20. PR-1343-U75795

**Tuan Fong Kui Lun [ Bukit Bintang ]** akan mencadangkan:-

"Bahawa Kerajaan memulihkan pilihan raya kerajaan tempatan seluruh negara supaya urustadbir Kerajaan menjadi lebih cekap, akauntabiliti dan bersih dengan mengambil langkah pertama untuk membuat kajian serius dan melakukan pungutan suara antara rakyat."

**[ Menteri Kesejahteraan Bandar, Perumahan dan Kerajaan Tempatan ]**

21. PR-1343-U75707

**Tuan Loke Siew Fook [ Seremban ]** akan mencadangkan:-

"Bahawa Dewan ini merakamkan sekalung tahniah dan setinggi-tinggi penghargaan kepada wira dan wirawati negara yang telah mengharumkan nama negara di Sukan Paralimpik dan Olimpik 2016 di Rio De Janerio. Kejayaan Mohamad Ridzuan Mohamad Puzi acara 100 meter, Muhammad Ziyad Zolkefli acara lontar peluru dan Abdul Latif Romly acara lompat jauh merangkul tiga pingat emas pertama untuk Malaysia dalam Sukan Paralimpik serta dua rekod dunia yang dicapai oleh mereka adalah satu kejayaan yang luar biasa dan sangat membanggakan. Atlet wanita Siti Noor Radiah Ismail yang memenangi pingat gangsa dalam acara lompat jauh di Sukan Paralimpik juga merupakan satu pencapaian yang membanggakan. Dewan ini juga merakamkan ucapan setinggi-tinggi tahniah terhadap atlet-atlet negara yang memenangi 4 pingat perak dan 1 pingat gangsa di Sukan Olimpik Rio 2016 iaitu pemenang pingat perak dalam acara badminton perseorangan lelaki Dato Lee Chong Wei, badminton beregu lelaki Goh V Shem-Tan Wee Kiong, badminton beregu campuran Chan Peng Soon-Goh Chan Ying dan pemenang pingat perak dalam acara terjun Pandeleda Rinong-Chan Jun Heong serta pemenang pingat gangsa acara berbasikal keirin Azizulhasni Awang. Atlet-atlet tersebut telah mencapai keputusan yang terbaik untuk kontijen Malaysia dalam sejarah penyertaan negara dalam Sukan Olimpik dan kejayaan tersebut harus dibanggakan oleh seluruh rakyat Malaysia."

**[ Menteri Belia dan Sukan ]**

22. PR-1343-U77348

**Tuan Liew Chin Tong [ Kluang ]** akan mencadangkan:-

"Bahawa Dewan ini bersetuju mengurangkan peruntukan untuk JPM dan menyalurkan kepada peruntukan bagi hal ehwal pendidikan, pengangkutan awam, kesihatan dan kebajikan rakyat. Peruntukan untuk Jabatan Perdana Menteri telah dihadkan tahapnya pada tahun 2008 iaitu masing-masing sebanyak RM3.4 bilion bagi peruntukan pengurusan dan RM3.5 bilion untuk pembangunan. Ini membawa kepada jumlah keseluruhan sebanyak RM6.9 bilion. Berbanding 2016, anggaran peruntukan pengurusan dan pembangunan telah melepasi tahap ditetapkan pada 2008 tersebut iaitu masing-masing sebanyak RM5.9 bilion dan RM14 bilion yang membawa kepada jumlah keseluruhan RM20 bilion."

**[ Menteri Kewangan ]**

23. PR-1343-U77349

**Tuan Liew Chin Tong [ Kluang ]** akan mencadangkan:-

"Bahawa Dewan ini menyokong cadangan menetapkan sebarang pembelian aset atau sistem pertahanan yang melebihi 100 juta oleh Kementerian Pertahanan, mesti dibawa ke Parlimen dibahas dan diaudit oleh Jabatan Audit Negara supaya untuk syarat meneruskan pembelian ini. Ini juga bertujuan untuk mempertingkatkan integriti dan keberkesanan pembelian sistem pertahanan. Ini adalah diakibatkan oleh pembelian Kapal Selam Scorpene telah menimbulkan banyak persepsi negatif terhadap negara."

**[ Perdana Menteri ]**

24. PR-1343-U76870

**Tuan Hee Loy Sian [ Petaling Jaya Selatan ]** akan mencadangkan:-

"Bahawa Dewan ini mendesak Kerajaan Persekutuan untuk siasat dan menangkap Malaysian Official No.1 yang disebut oleh Jabatan Kehakiman Amerika Syarikat dalam kes yang memindahkan sejumlah wang lebih USD1 billion daripada 1MDB ke akaun peribadi Malaysian Official No.1."

**[ Menteri Dalam Negeri ]**

25. PR-1343-U77437

**Tuan Manivanan a/l Gowindasamy [ Kapar ]** akan mencadangkan:-

"Bahawa Dewan ini mempertimbangkan cadangan untuk menghalang dan mengharamkan penjualan arak murahan (cheap liquor) secara mudah dan murah yang semakin berleluasa. Gejala pengambilan arak murahan ini menimbulkan pelbagai masalah sosial seperti keganasan rumah tangga dan gengsterisme serta merosakkan organ dalaman. Di samping itu, kawalan dan penyeliaan terhadap kedai-kedai menjual arak perlu diketatkan. Masa penjualan arak dan lokasi minum arak perlu dikaji."

Kawasan tempat awam seperti di taman awam dan taman permainan kanak-kanak, minum arak wajib diharamkan. Dewan ini juga wajib mempertimbangkan penubuhan Pusat Pemulihan Arak (PPA) di setiap negeri di Malaysia untuk membendung masalah minum arak yang semakin berleluasa di kalangan anak muda merentasi sempadan bangsa dan agama.”

**[ Menteri Dalam Negeri ]**

26. PR-1343-U77438

**Tuan Manivanan a/l Gowindasamy [ Kapar ]** akan mencadangkan:-

“Bahawa Dewan ini mempertimbangkan cadangan untuk kes kematian di bawah tahanan Polis DiRaja Malaysia, keluarga simati diberi kebenaran sepenuhnya untuk memperoleh Pakar Perubatan Forensik sendiri bagi mewakili pihak keluarga si mati semasa bedah siasat dijalankan.”

**[ Menteri Dalam Negeri ]**

27. PR-1343-U77439

**Tuan Manivanan a/l Gowindasamy [ Kapar ]** akan mencadangkan:-

“Bahawa Dewan ini mendesak agar pendidikan agama diperkenalkan di sekolah kepada pelajar bukan Islam sebagai langkah untuk menerapkan nilai-nilai murni dan keagamaan di kalangan pelajar bukan Islam bagi menangani gejala sosial yang kian meningkat dan berleluasa akibat daripada kegagalan sistem pendidikan di Malaysia.”

**[ Menteri Pelajaran ]**

**RISALAT-RISALAT YANG DIBAWA KE DALAM MESYUARAT  
(DEWAN RAKYAT)**

<b><u>TAHUN 2016</u></b>	<b><u>RISALAT/DOKUMEN</u></b>	<b><u>TARIKH DIBENTANGKAN</u></b>
CMD.23	Laporan Tahunan Suruhanjaya Perkhidmatan Pelajaran Bagi Tahun 2015.	17 Oktober 2016
ST.74	Laporan Tahunan dan Penyata Kewangan Lembaga Tabung Angkatan Tentera (LTAT) Bagi Tahun 2015	17 Oktober 2016
ST.75	Laporan Tahunan dan Penyata Kewangan Perbadanan Perwira Harta Malaysia (PPHM) Bagi Tahun 2015.	17 Oktober 2016
ST.76	Laporan Tahunan dan Penyata Kewangan Perbadanan Perwira Niaga Malaysia (PERNAMA) Bagi Tahun 2015.	17 Oktober 2016
ST.77	Laporan Tahunan dan Penyata Kewangan Perbadanan Hal Ehwal Bekas Angkatan Tentera (PERHEBAT) Bagi Tahun 2015.	17 Oktober 2016

**\*\*UCAPAN**  
**( PERATURAN MESYUARAT 17 BAHARU )**  
**( KAMAR KHAS )**

<b>Tarikh Ucapan</b>	<b>Ahli Yang Berucap</b>	<b>Tajuk Ucapan</b>	<b>Menteri Yang Bertanggungjawab</b>
1. 17.10.2016 (Isnin)	1. YB Tuan Liew Chin Tong (Kluang)	1. Masalah Judi Haram Kini Menjadi Barah Masyarakat Dan Ekonomi Semasa, Langkah Lebih Konkrit dan Bersepadu Perlu Segera Digerakkan.	1. YB Menteri Dalam Negeri

**\*\* Ucapan Di Bawah Usul Berkenaan Perkara Tadbir Kerajaan (Peraturan Mesyuarat 17 Baharu)**